

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ei te ture, ei te parau, ta ratou e imi; ia ore ia faaau i ta ratou parau i taua parau ra, no te pouri ia i na reira'i ratou ra.” Isaia 8: 20.

Nu. 10.

Atopa, 1913.

Mat. 6.

Te Monoraa i te Aposetoloraa Matamua.

Mai Tei Haapiihia e te Ekalesia Katolika Roma.

(Tuatiraa.)

I ROTO i ta Ioane episetole hoê, 2: 18, 19, te na ô mai nei oia: “E au mau tamarii ra, o te hora hopea ra teie, e ta outou i faaroo ra e, te haere maira taua anetimesia ra, oia atoa i teie nei e rave rahi te anetimesia e vai nei; i ite ai tatou e, o taua hora hopea ra teie. Haere atura ratou mai roto atu ia tatou nei, e ere râ ratou i to tatou; ahiri hoi ratou no tatou ra, e tia â ia i ô tatou nei: haere atura râ ratou, ia itea-maitai-hia ratou, e ere ratou atoa ra i to tatou.” Te faaite papu mai nei teie parau e, ua ite hoi Ioane i te tiaraa mai o te mau orometua haavare, e te feia haru mana, i te parauraa mai e, e mana to ratou e au i to Petero ma. O te Aposetolo ra o Ioane ia te Aratai, e te Peropheta mau i te ekalesia ra, e e toru ahuru matahiti i muri mai i te poheraa no Petero, faaite ihora hoi te Fatu i te mauraa no te parau na te Peropheta ra na Amosa i te ekalesia, a parau atu ai oia e, “Aita a te Fatu ra a Iehova e peu i rave, maori râ ia

faaite i ta'na parau i moe i ta'na ra mau tavini i te mau Peropheta." I roto i te matahiti 96, ua ûrû hoi Ioane ia papai i te buka maere rahi, oia hoi te Apokalupo. Ua heheu maira te Fatu i ta'na ra Peropheta i te mau mea e tupu a muri atu, e ite ihora Ioane i te mau mea'toa e tupu, mai to'na iho tau e tae noa'tu i te hopea ra. Ua ite mai hoi te Fatu, e faatura maira i ta'na ra Peropheta i nia i te ao nei. E tia i te Katolika anei ia faaite mai i te reira huru ite-raa-hia no to ratou na pope e toru i muri mai ia Petero, e mai te mea aita, eaha i ore ai?

A taio na tatou i te tahi vaehaa no teie nei heheuraa na Ioane. I te Apokalupo 1: 10, 11, te na ô mai nei te parau: "I riro vau i te Varua i te mahana a te Fatu ra, e faaroo a'era vau i te hoê re'o rahi i muri iho ia'u ra, ma te oto pu ra, i te na ôraa mai e, O vau te Alepha e te Omega, te matamehai e te faahopea: e ta oe e ite nei, e papai i roto i te hoê buka, a haponu atu ai i na ekalesia e hitu i Asia ra: i tei Ephesia ra, e Semurina, e Peregamo, e Tuatira, e Saradi, e Philadelephia, e Laodikea ra." Eaha i ore i faahitihia'i te ekalesia Roma? Ahiri e ekalesia ta te Fatu i reira, aita anei oia i hinaaro ia tae atoa'tu ta'na parau ia ratou na roto i ta'na ra Peropheta? Oia mau. Area râ, i taparahihia na te mau Feia Mo'a mau no Roma, na roto i te mau hamani-ino-puai-raa i to te ekalesia i reira. Ua horomii hoi te haapaoraa etene i te haapaoraa cherisetiano, e e huru etene mau hoi te mau haamoriraa no te ekalesia Katolika Roma i teie nei â. I roto i te heheuraa na Ioane, ua faaite papu maira oia i te huru no te ekalesia Katolika Roma. Te na ô maira oia: "Te ahu ra taua vahine ra (oia hoi te ekalesia) i te ahu uraura e te uteute, e ua faaunaunahia i te auro, e te ofai maitatai ra, e te poe, e e au'a auro tei tana rima ua i te mea faufau, e te ino no ta'na ra faaturi: e e i'oa tei papaihia i nia iho i to'na rae, E mea aro, o Babulonia Rahi, o te metua vahine o te mau faaturi, e te mau mea faufau o te ao nei. E ua ite au i taua vahine ra i te taeroraa i te toto o

te feia mo'a ra, e te toto o te mau ite no Iesu i pohe ra: maere atura vau i taua iteraa no'u ia'na ra, e maere rahi to'u. * * * Ei ô nei te aau paari. Na omii e hitu ra, e hitu ia mou'a e parahihia e taua vahine ra." Apokalupo 17: 4-6, 9. E tatara tatou i teie nei mau parau. Te ahu noa ra te mau pope i te ahu uteute, e te ahu ra te mau karatino i te ahu uraura; e ia rave ratou i te ohipa toroa, ua faaunaunahia i te auro, e te mau ofai maitatai ra, e te poe, ma te hoê au'a auro i roto i to ratou mau rima. Na te parau tuatapapa o te ao nei i faaite mai ia tatou e, i hamani-ino puai na hoi ratou i te Feia Mo'a, oia ia ua faataero ratou ia ratou iho i te toto no na milioni taata parau-tia ra, i taparahihia e ratou no te faaroo. Teihea te tahi atu ekalesia, o te parahi to'na upootia i roto i te hoê oire, i faatihia i nia iho i na mou'a e hitu, maori râ te ekalesia Roma? Te na ô mai nei te heheuraa e, "Na omii e hitu ra, e hitu ia mou'a i parahihia e taua vahine ra (oia hoi te ekalesia)." Ua faatihia ihora Roma i nia iho i na mou'a e hitu ra, e tei Roma hoi te upootia no te ekalesia Roma. E mea papu roa hoi te faaiteraa.

E teie nei, ahiri i noaa i te ekalesia Katolika Roma te mana no ô mai ia Petero, ua papu roa e, e horoa mai te Atua i te heheuraa ia Clement, te toru o to ratou mau pope, e aita i te Aposetolo ra ia Ioane. Ua papai atura Ioane i ta'na episetole i roto i te matahiti 96, e te mau noa ra Clement i te toroa pope i Roma i taua taima ihora. E ere anei ia e mea maere rahi e, ua ite-ore-roa-hia teie nei ekalesia aposetolo e te Atua mai te reira te huru? E ere anei ia e faahaparaa, i parau-ore-hia, ia ratou no to ratou haruraa i te mana? E teie nei, aita anei tatou i farii ma te ravea ore i te parau mau e, ua rahi roa'tu to te Atua aroha ia Ioane pîpî here i to'na aroha i teie nei mau pope? Oia mau roa.

Ahiri e tia ia faaite-papu-hia e, ua vai maite noa mai â te toroa aposetolo, ei reira ua faaitehia e, ua hape te hoê tufaa rahi no ta tatou Bibilia nei, e no te Bibilia Beritane, e no te hoê Bibilia i iritihia e te hoê taata, o Douay to'na i'oa, atoa hoi. Na teie nei na Bibilia i haapii papu mai i te tai-varaa no te ekalesia ra, e no te tiahiraa'tu i te vahine (te ekalesia) i roto i te medebara, e i te haruraa i te tamaiti (te

autahu'araa mo'a ra), e te hopoiraa'tu ia'na i te Atua ra. Te faaite mai nei teie nei na Bibilia ia tatou e, e haavî Sātani i te mau nunaa atoa, e te mau opu atoa, e te mau re'o atoa, e te mau fenua atoa; e e ati hoi te fenua nei i te pouri, e e vai hoi te pouri taotao i roto i te aau no te mau taata; e e hapahia te ture ra, e ruri-ê-hia tei haapaohia ra, e e haapi'ohia te faufaa haapao-tamau-hia ra. E haaputu ia te mau taata i te orometua i au i to ratou iho hinaaro; e e parau mai te tahi e, no Paulo vau; e te tahi, no Apolo vau; e te tahi, no Kepha vau.

Area râ, ua tupu mau teie nei mau mea, e te vai papu noa nei â ia, e aita i roto i te ekalesia Katolika ana'e, i roto râ i te mau haapaoraa e hope roa'e, tei tupu mai, no roto mai ia'na ra. Mai te tau no Totatine te Rahi mai, fanau noa maira oia, oia hoi te ekalesia Katolika, i te mau tamahine faaturi, o tei haaviivii i te mau nunaa atoa o te ao nei i ta ratou mau hairesi pohe ra, e te parau a te mau demoni ra.

Mai tei ite-papu-hia, ua hopoi atura Totatine i to'na nohoraa emepera i te oire ra i Bizanatum (Byzantium), ei reira faatia ihora oia i te oire apî no Totatinopele (Constantinople). Ua opua ihora oia ia faairi i teie nei oire ei Roma apî, mai te haamau i te mau peu, e te ratiitii, e te huru nehenehe no Roma tahito ra. No ta'na raveraa i teie nei mau mea i faatupuhia'i te mârô-puai-raa i rotopu i to te ekalesia, e ua afâfâ hoi te feia toroa. Ia ite te episekopo no Totatinopele (Constantinople), oia hoi te Roma apî, e, ua faairiohia ia to'na oire ei nohoraa emepera, hinaaro ihora oia ia faito roa oia i te episekopo no Roma tahito ra, e hinaaro atoa oia ia na mua hoi oia i te mau episekopo atoa i roto i te ekalesia. Na teie i faatupu i te maheaitu rahi roa i ropu i te episekopo no Roma e te episekopo no Totatinopele, e ua amaha te ekalesia, e te reira ia te tumu no te riroraa o te ekalesia Heleni ei haapaoraa ê roa i te ekalesia Roma, ma te episekopo no Totatinopele ei upootia no'na. I muri iti a'era i te reira, ua parauhia te ekalesia i Roma, te ekalesia Latini, ma te pope Roma ei to'na upootia. Tei ia vai, no teie nei na pope e piti, te mana mau? Tei te pope no Roma anei, e aore râ tei te pope no Totatinopele anei?; e o vai hoi tei hi'a mai to'na parahiraa toroa no to'na titau toroa, e te nounou tura? E aore râ, ua hi'a anei raua e piti?

—IRITHIA E OLE PETESONA.

Te Parau Tuatapapa no Iosepha Semita.

(Tuatiraa.)

PENE XXXVII.

Matahiti 1843-44.

Ua riro ia te Poropheta ei hi'oraa maitai no te taata tia mau. Te taivaraa no te tahi mau hoa tahito no'na. Tae maira Orina P. Rokawe. Titau ihora Iosepha i te toroa peresideni no te hau Amerika. Te hoê tohuraa no te Feia Mo'a. Te ohipa a te mau enemî no Iosepha.

Ua tae hoi te Peropheta ra o Iosepha Semita i te tau hopea no te hau i roto i to'na oraraa nei, e i teie nei taimē, e hi'oraa maitai roa oia no te taata tia mau. Aita i iteahia te hoê taata tahuti noa, mai te matamua mai â, tei hau i te parau-tia ia'na ra. E mea puai e te itoitō hoi to'na tino, e e mea itoitō e te maramarama hoi to'na mana'o. Ua hau ê to'na feruriraa i te paari e te maitai i to te mau taata atoa no te ao nei, e ua riro mau ia te Varua Maitai ei orometua, e ei hoa no'na. Ua ite oia e, ua fatata roa to'na poheraa, e na te reira ite i faateitei ia'na i nia'e i te mau paruparu o teie nei ao. Ua rahi to'na mau mana'o parau-tia, e te mau haapiiraa nenenehe, e ua tamata puai noa'tura oia i te haapii papu atu i taua mau mea ra i te Feia Mo'a. Auê hoi te nehenehe o to'na oraraa nei!

I roto i teie nei mau ava'e hopea, haapao ihora ta Iosepha mau enemî i te tahi mau apooraa, mai te tamata i te faatupu i te riri rahi no te mau taata ia'na, e ua hi'a hoi te tahi mau hoa maitatai tahito no'na i te hara, e taiva'tura ratou i te Ekalesia. O Wilisona Lau ia te hoê no ratou. I parau na hoi oia i te mau parau u'ana i te parururaa ia Iosepha; i teie nei râ ua moe ia'na to'na aroha tahito, e riro ihora oia ei enemî ino roa no'na. Ua na reira'toa o Viliamu Lau, Faranisa raua o Kaunece Higibe, e Robeta raua o Tihare Fotera; e ua moe atoa ia te varua no te Evanelia ia

Sidine Ritidone, e ua fatata oia i te hurihia i rapae i te Ekalesia, a ani atu ai Haeramu Semita ia hi'o aroha mai te Feia Mo'a ia'na. Ua ite papu Iosepha i to Sidine huru mau, e aore oia i tiaturi i nia'e ia'na ra.

I te 25 no Ditema, 1843, ua tae maira o Orina Potera Rokaweale i te fare no te Peropheta, ma te rouru roa roa, e te huru taehae mau. I faatiamâ-tia-hia na oia, mai ta Iosepha i tohu ê na, e ua haere maira oia mai te fare auri i Misouri mai. Faaite atura oia i te huru no to'na mau peapea ia Iosepha raua o Haeramu, e na te hoê mea iti i faaite i to'na huru maitai: Ua ite hoi o Renolada i to Iosepha tiaturiraa i nia iho ia Potera, e tamata ihora oia i te taparu ia'na ia tuu mai ia Iosepha, e tia'i i to Misouri ia tapea ia'na. Ua parau atura o Renolada ia Potera e, "Mai te mea e tuu mai oe ia Iosepha i roto i to matou nei rima, e aufau matou i te moni ta oe i hinaaro." Pahono atura râ Potera ia'na e, "E na mua hoi au i te ite ia outou paatoa i te faahapahia, ei reira hoi e ore roa vau e na reira."

I roto i te mau ava'e matamua no te matahiti 1844, ani maira te mau taata paari e rave rahi ia Iosepha ia faatia ia tuuhia to'na i'oa ei taata titau i te toroa peresideni no te hau Amerika. E oti a'era Iosepha i te feruri e te pure, faatia ihora oia, e i te 29 no Tenuare, ua tuuhia to'na i'oa i mua i te mau taata i Navu. I te hebedoma i muri iho, papai ihora oia i te hoê parau rahi i te mau taata paatoa no te hau Amerika, mai te faaite atu i to'na mau mana'o no nia i te mau ohipa no te peresideni e te mau taata faatere no taua hau ra. Ua faaite atura oia e, ua hape roa te ohipa rave tîti, e e ravea maitai roa ia ia hoo te hau Amerika i te mau tîti e hope roa'e, ei reira e faatiamâ ia ratou. Ahiri i na reirahia aita i tupu taua tama'i rahi i ropu i te mau tufaa fenua apatoa e te mau tufaa fenua apatoerau no Amerika ra, e aita i pohe te mau milioni o te taata, e aita hoi i pau te mau milioni o te dara i taua ohipa ino ra. Ua haere atura te tahi mau Aposetolo e te mau Peresibutero e rave rahi i te mau

mataeinaa e a'o atu i te mau taata, mai te tauturu i te ohipa maitiraa ia Iosepha ei peresideni.

A tamata noa'i Iosepha i te faatupu i te hau, te haapao noa ra to'na mau enemi i te mau apooraa, mai te imi i te tahi ravea ia haamou ia'na. Ua haapaohia te hoê apooraa i Karatage i te 17 no Febuare, e opua ihora te mau taata i te taparahi ia Iosepha. Ua faahua parau-tia ratou i mua i to te ao nei, mai te faataa i te hoê mahana no te haapaeraa i te maa, e te pure.

I tohu ê na hoi Iosepha e, e haere te Feia Mo'a i te mau Mou'a Ofai ra, e e riro hoi ei feia puai roa i reira ra. I teie nei, ia ite Iosepha i te mau huru peapea te tupu noa mai, tonono atura oia i te tahi mau pŭpŭ taata i te pae i te tooa o te râ ia hi'o i te huru no te fenua, e ia imi i te hoê vahi au maitai ei faaeearaa no te Feia Mo'a. Ua hinaaro te mau taata e rave rahi ia haere, e ua faaineine ratou ia ratou iho. Ua tohu atura Iosepha i teie nei taima e, ia tae i te pae o te matahiti i muri a'e, eita roa to te enemi e mana i nia'e i te Feia Mo'a, e e pae matahiti i muri iho i te reira, ua tupu mau ta'na tohuraa, no te mea ia tae i te matahiti 1849, tei roto ia te pae rahi o te Feia Mo'a i te peho no te Roto Miti Rahi.

Ua haapaohia te amuiraa no te Ekalesia i Navu, mai te haamata i te 6 no Eperera, 1844. I te mahana Sabati, oia hoi i te 7 no Eperera, haaputuputu atura e piti ahuru tausani Feia Mo'a e faaroo i ta Iosepha a'oraa. I pohe na hoi o Kinga Foleta, te hoê Peresibutero haapao maitai, i te tahi mau mahana i mua'e i te reira, e tae a'era to Iosepha mana'o i nia i te hanahana mure ore o teie nei taata, e o te tahi atu â mau Feia Mo'a mai ia'na te huru. Ua ûrû-roa-hia Iosepha e te Varua Maitai, e a'o atura oia i na hora e toru e te afa. Mai to te hoê melahi ia to'na re'o, e ua maere te mau taata'toa i ta'na ra mau parau.

Aita i tia i te na taata Lau e te na taata Fosera ia huna faahou i ta ratou mau hara, e huri-faaite-hia'tura ratou i ra-

pae i te Ekalesia. I teie nei i haamata mau ai ta ratou mau ohipa tia ore, e i taua hebedoma ihora, ua tapeahia ratou no to ratou aro-puai-raa'tu i te tahi mau taata toroa no te fenua. Aita Iosepha i hinaaro ia vare te Feia Mo'a ia ratou, e no reira faaite papu atura oia i to ratou huru mau, e i to ratou hinaaro i te taparahi i te taata. Ua haere atura teie nei na taata i Karatage, e tapu atura ratou i te hoê pari-haavare-raa ia Iosepha i mua i te haavâraa i reira ra.

Ua faaroo ihora Iosepha e, i horoahia na te hoê faaue-raa no to'na tapea-raa-hia, e i te 25 no Me, haere atura oia i Karatage, e tuu atura oia ia'na iho i roto i te rima no te mau taata toroa. Ua tarahu oia i te tahi mau haapii ture, e ani atura oia ia haapao-vave-hia te haavâraa, aita râ ratou i faatia, e ua faaroaroahia te taime e haapaohia'i te reira. Ua tuuhia Iosepha i roto i te rima no te mutoi rahi; ua ite râ oia i to Iosepha huru mau, e faatiamâ atura oia ia'na. Ua faaroo Iosepha e, te opua noa ra to'na mau enemi ia taparahi ia'na i taua pô ihora. Tei pihaiho ia o Haeramu e te tahi atu â mau hoa ia Iosepha, e ia ore te mau enemi i tia maite, faarue atura ratou i Karatage. Ua horo oioi ratou i Navu, na nia i ta ratou mau puaahorofenua, e tae atura ratou i to ratou mau fare i taua pô ihora.—OLE PETESONA.

(E tuatihia mai teie parau.)

“E mai te mea e ere outou te mamoe a te tia mamoe maitai ra, o ta vai atu nănă mamoe outou? Te faaite atu nei au ia outou na e, o te diabololo ta outou ia tia mamoe, e no ta'na nănă hoi outou; e o vai te tia ia patoi mai i teie? Inaha, te parau atu nei au ia outou na e, o tei patoi maira i teie nei mau parau, e taata haavare oia e e tamarii hoi oia na te diabololo ra.

“Te faaite atu nei au ia outou na e, o te mau mea maitai, no te Atua ia; e te mau mea ino, no te diabololo ia.”
Buka a Moromona, Alama 5: 39, 40.

Te Hoê Poheraa.

U A pohe a'enei to tatou taeae o Turoautea a Teohoteatua, te Peresibutero Tiai no te amaa i Taahuaia, i Tubuai, i te ma'i hî toto, i te hora 9 i te poipoi no te 23 no Atete, 1913. I mua iti a'e i te 22 no taua ava'e ra, hou oia i pohe ai, ua ani maira oia i te Autahu'araa ia putuputu atu i mua ia'na. Ua haere atura te mau Peresibutero e farerei atu ia'na. Ua ui maira oia e, "Ua tae ana'e mai nei outou." Pahono atura te Autahu'araa, oia hoi te mau Peresibutero, "E." Parau maira oia e, "E faaroo mai outou i te parau ta'u e faaite atu ia outou. Teie taua parau ra: I teie nei mahana, te tuu atu nei au i teie nei ohipa ta'u e amo, e ta'u e tiai i roto i to'u nei oraraa. O ta'u atoa hoi i faatere; te vahi atoa ta'u e haere e rave i te ohipa; e te vahi e taahihia e au ra. Na outou ia e amo i teie nei ohipa i nia i to outou taponu; e faaitoito; eiaha e aueue; eiaha e vare; eiaha ia paruparu i te raveraa i teie nei ohipa. O te toru ahuru ma hoê teie nei mahana i to'u vairaa i teie nei ma'i, e ua paruparu vau i teie nei; e te ite nei au e, ua tae i te taime e rave mai ai ta'u Fatu ia'u. Aore roa te parau o roto mai i to'na vaha i hape noa'e." Ua ui atura te Autahu'araa e, "Tirara anei to oe mana'o." Pahono maira, "E." E poipoi a'era i te mahana i pohe ai oia ra. Aroha maira i to'na ihora fetii, e faatia a'era i to'na rima i nia. E poheraa maitai roa to to tatou taeae, e ua riro ta'na parau ei mea maere i te taata.

—Papaihia e RUA.

"E faaroo atura vau i te hoê reo no nia i te ra'i, i te na ôraa mai ia'u e, A papai na; E ao to te feia i pohe ma te faaroo i te Fatu e pohe ai ra: te parau maira hoi te Varua, oia mau, ia faaea ratou i te rave i ta ratou ohipa, e e pee hoi ta ratou ohipa ia ratou." Apakalupo 14: 13.

Te Mau Parau Apî.

Ua tupu taua ma'i ino rahi roa, oia hoi te Cholera, i Europa, i roto i te mau fenua Balakana te tupuraa. Ua parauhia e, e 1,555 taata i roohia i taua ma'i ra, e ua pohe roa e 661.

Na nia i te pahi auahi ra Tahiti, i to'na tere hopea, ua haponu atu to Raratoa ma e 2,000 afata anani i Niu Zilani, e i tae atu ai taua mau anani ra i reira, ua iteahia e, ua ma'ihia taua mau anani, e ua hurihia e hope roa'e i roto i te hoê umu rahi, e pau roa'tura. Tera mai hoi te moni i pau i taua ati, e 7,000 dara.

I te 23 no Atete, ua haapaohia te hoê motomotoraa i Los Angeles, i Tarafonia. A motomoto ai e toopiti taata, ua tupaihia te tahi i nia i te taa, e ua topa oia i raro, pararî ihora to'na upoo. Ua itoitro roa e toomaha taote i te faaora i taua taata i pohe ra, aita râ e ravea, e poipoi a'era, ua pohe roa oia. I teie nei ua tapeahia te tahi o taua na taata moto i te fare auri, e e haavâhia ona no te taparahi taata. I to matou hi'oraa e ere roa ia te ohipa motomoto e mea nehenehe; e ohipa etene mau ia tamata te tahi ia haaparuparu i te tahi.

I te fenua ra i Takume, te tupuraa o te hoê ma'i, oia hoi te hî toto. E mea puai e te ri'ari'a: e toru mahana to te tahi taata e ua pohe roa. Teie to'na tupuraa, e haamata te hî noa, e muri a'e e tupu mai ai te hî toto, e e piti mahana no te hî toto ua pohe roa. Ua pohe te tahi i teie mahana, ananahi ua pohe te tahi, ananahi atu ua pohe te tahi; e te faaitoitro noa nei â te taote i to'na toroa, area râ aita â i itea te raau tano maitai; area râ ua tono te Atua i te Arii mātā'u rahi ra o te pohe i te utuafare o te taata teitei, e te taata haehaa atoa.

I roto i te ava'e Atete, ua fanau mai te hoê puaa maohi, i Takume, i te Tuamotu, i te hoê fanau'a, e piti affi, e toru mata, e e piti vaha. Aita taua fanau'a i ora mai, ua faaroo râ matou e, ua tapeahia te affi i roto i te ava, ei faaiteraa i te taata.

I te 4 no Setepa, ua mairi mai te ra'i mai te hoê meteorite, oia hoi te hoê mea e huru au i te fetia. E ia topa mai taua mea ra, ua tano roa i te hoê anavai, e ua puai roa te haruru o te au pape. E rave rahi te haamaramarama tei pararî, e ua parauhia e, ua faaroohia te haruru no taua mea ra e 20 maile i te atea. I Rhode Island, i Amerika, te tupuraa no taua mea maere ra.

I te ava'e ra Tiurai, ua haamata te emepera no Purutia, o Viliamu, i te haapae i te inu i te mau huru ava, e te uina, e e ore atoa oia e inu faahou i te bea, no te mea tei roto atoa i te reira te tahi alcohol, oia hoi te ava. Te tamata nei taua arii ra i te riro ei hi'oraa maitai roa no to'na ra mau taata. E mea puai ta'na faahaparaa i te peu inuraa ava, e ua na ô maira oia e, ia inu te mau taata i to'na oraraa maitai, e mauruuru roa oia ia inu ratou i te pape ana'e.

O te parau apî teie no te tâpûraa i Panama, oia hoi, i te 7 no Setepa, ua oti roa te heruraa i te repo mārô, e te haamata nei ratou i te iriti ê atu i te mau matini, e te mau purumu pereoo auahi. E faanehehe-roa-hia taua tâpûraa ra i roto i te ava'e Setepa, e i te 5 no Atopa e tuuhia te pape i roto i te tâpû, e i na mahana i muri iho i te reira, e pupuhihia te hoê paturaa tapearaa miti, ei reira ua oti roa te rahi o te ohipa. Ua parauhia e, ia tae i te 10 no Atopa nei, e nehehehe noa ia haere te mau pahi na roto i taua purumu ra, mai te tahi miti e tae noa'tu i te tahi mîti. Eiaha ia mana'ohia, ua oti roa taua ohipa ra mai tei opuahia; e riro paha, ua toe e rave rahi te mau mea, aita i oti roa, e tia râ ia tere te mau pahi na taua purumu apî ra.

Te peapea noa ra te hau Mexico, e te tama'i noa â i te orure hau. I te tahi mau mataeinaa, ua huru mou roa te mau taata i te pohe; e no te oreraa o te taata, te opua nei te hau Iapone i te tonono atu i e 50,000 taata, ia taatahia te hoê mataeinaa, o Morelos.

I te 5 no Setepa, i te fenua ra i Takume, ua patia te hoê taata, o Pukarua, ia'na iho i te tipi, i te ouma, aita râ i hohonu te tipi i roto. Teie te tumu i patia'i oia ia'na, ua mana'o ihora oia e, ua pohe to'na teina, no te mea ua vai to'na ra teina i te ma'i paruparu roa, no reira ua patia oia ia'na, ia pohe vave na mua, hou to'na ra teina; e i to'na patiaraa, ua puta oia. I te hi'opoaraa o te taote, ua na ô maira oia e, eita oia e pohe; e te ora noa nei â oia i teie nei.

Ua parauhia e, ua noaa e 70,000, o tei pohe i Beritane i roto i te matahiti hoê no te ma'i tutoo papaa. Ia taiohia na nia i te hebedoma ra, e noaa ia e 1,350 tei pohe i te mau hebedoma atoa. I te tomoraa o te pahi rahi ra o "Titanic", e te poheraa o te mau taata e 1,700 ra, ua auê te mau taata i te maere e te ri'ari'a, area te mau taata o te pohe nei i Beretane ra, e 1,350 i te mau hebedoma atoa ra, aore roa ia te mau taata e haamana'o noa'e i te reira. Ua imi te mau taata e rave rahi i te raau e tano i taua ma'i ra, aita râ ratou i manuïa maitai. Ua parauhia i roto i teie nei matahiti, na te hoê taote paroo i Purutia i ite i te hoê raau e ora'i taua ma'i ra, e ua haapeepee roa te hoê ona e faaau ia'na ia faa-ora i to'na hunoa, aita râ i tano te raau.—Maitihia.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.